

طوق

(عن رواية يحيى الطاهر عبد الله)

صياغة و دراماتورج
محمد علي إبراهيم

مسرحية (طوق) - عن رواية (الطوق والإسورة) - صياغة ودراماتورج : محمد علي إبراهيم

التغريبة الأولى

تفتح الستار على أطلال الكرنك ممثلة في بعض الأماكن في الأقصر في أربعينات القرن الماضي ، ويضم المسرح أماكن عدة ، بيت البشاري في المنتصف وحوله أطلال للمفردات والأماكن التي تدور فيها الأحداث بعيدا عن بيت البشاري ، مثل الدير الغربي و ورشة الحداد وغرفة نومه بالإضافة إلى المعبد ، كل تلك المناظر تبدو للجمهور أطلال لا تبين ملامحها إلا باستخدام الإضاءة ، في حين يقف الممثلون في بداية كل مجموعة من المشاهد يصفون الحالة للنظارة محايدين.

الحداد : مع الرجال رحل مصطفى إلى السودان وهو بعد صبي ، مر عام والثاني يطوى شهره الأخير وما من خبر عن الغائب

الحدادة : عقل حزينة مع إنها هناك في البلاد البعيدة ، عينها اليمنى فقدت النور من عامين.

عبد الحكم : بعينها اليسرى ترقب البشاري الراقد يتقلب فوق المصطبة التي تطوق جذع شجيرة الدوم

الحداد : صار بعد العمر الذي مر كالفقة ، ترفقها من مكان به ضل ، يرقب الشمس الجارية ويصرخ

البشاري : الشمس يا حزينة

الحدادة : ويصرخ في حين آخر.

البشاري : الضل

الحداد : هكذا تمر الأيام التي تطوى الأعمار هي وأبنتها تحملان القفة من الشمس إلى الضل ومن الضل إلى الشمس

الحداد : مصطفى الأصغر لكنه سيد فهمية التي تكبره بعامين ونصف ،

الحدادة : يضربها وتجنه والأم موافقة والأب موافق ، مصطفى حامي فهمية ومخوفها من العيب ،

الحداد : مصطفى رجل وفهمية بنت ، والبنت ثوب أبيض طويل الذيل ، عليها أن تمسك بذيل ثوبها وتمشي في

الطريق محاذرة ، وهل بالطرق غير التراب والوحل والقش

خفوت تدريجي للإضاءة من على الشخصيات وترتكز الإضاءة لبيت بخيت البشاري

لتبدأ الأحداث..

بيت البشاري

البشاري يجلس فوق مصطبه التي أستقر عليها وقد أنتهت فهمية من تلبية إحتياجاته لينتهي بها الحال جالسة أمام الصندوق والبشاري منزويا في ركن

فهمية: (تقبل رسائل أخيها وتحديثها نفسها) الجوابات كترت يا خوى ، لو كنت باعرف أقرا ، بيتهيا إلى كنت ح أحفض كلامها ده صم ، إتغربت يا مصطفى وانا عايشة على رجوعك سالم !!، وقتها تعاود ريحتك تملأ على الدار وأتونس بيها ؟!، تأمر وأعصاك فتضبرني !، ميتة تعاود لأجل مارتقص في عرسي ؟!، وبيدك تنقيلي شواري ؟! ، بعد ما تختارلى عريسي ، ع يشبهلك، لاه محدش يشبهلك، يمكن أطول ولا أقصر منك ؟!، يمكن ابيض ولا اسمر منك، (تترك العنان لنفسها) لكن دمه حامى زى دمك !، راجل ، لو يشخط يوقع قلبي ، يرجفني ، ح أخاف منه . لكن ح أحبه ، ح أتعطر له ، ح يشم ريحتي من قبل ما يدخل خشم الباب، ح أتكحله، ح يشوفني أجمل من كل بنات العمده ، حبيبي ألى ح أحبه، ولو كان عبد أسود.

تدخل عليها حزينه فجأة لترتك فهمية وأمها تتأمل الدار

حزينه : (مداعبه) والنبي لو متى قبل ما تتجوزى لادفن الصندوق ده معاكى، يابت النهار فرك وبيتنا ولا سوق التلات ، قشر التوم الى مالى الدار يجيب الفقر كفايه الفقر الى راكبنا ؟. **فهمية :** أنا مش رايقة للدار.

حزينه : وبالك رايق للصندوق عاد ؟

فهمية : أبوى ما ع يطلش طلبات قوميني ، قعديني ، شرييني قشريلى برتقانه بردان خرجيني للشمس، تحريت دخلينى جوه ، ولو قتلته استنى شويه يزقق ويقيد الدنيا حريقه !!.

حزينه : (تتكزها) حسه فى الدنيا ، والنبي لو شويه عضم ف قفه ؟ ، (تذهب للبشاري تطمئن عليه) هو الى ساند الدار وأوينا فى ضله بعد ماسافر مصطفى .

فهمية : قلبى يقولى أنه قرب يرجع ؟

حزينه : (بغضب وهي تطاردها) أنا قلت يابت مش راجع!!

البشاري: (مهللا) بعد أن إستفاق يا حزينه إيه فيه ؟ ماله مصطفى ؟

حزينه : (ضاحكه) أنت يا راجل بتسمع الى بدك تسمعه وبس ؟

البشاري : (مهللا) بتقولى ايه يا وليه ؟ دلوك أقوم أكسر راسك قوليلي اتنى يا فهمية ماله مصطفى ؟ بعث جواب ؟!.

فهمية : ما قولنالك يا آبه انه بعث امبارح ويسلم عليك .

حزينة : وبعثلك حته تعملها جلبيه ، وتروح تزور خلوة الشيخ يوسف زى زمان .

البشارى : الشيخ راح الحجاز والخلوة فاضية ؟

حزينة : يا راجل متقولش إكده ، الخلوة عامرانة ناس والشيخ يوسف مفارقهاش ، مانت خابر الشيخ وخلوته الى ع طول .

البشارى : يا ولية يا خرفانة الخلوة فاضية ؟

حزينة : (تلاحظ فهمية التي تجلس بلا عمل) وفهمية كمان فاضية يابت اكسي قشر التوم !!.

البشارى : متفزعيش في البت إكده ؟! الله يمسيك بالخير يا شيخ يوسف ، سافرت وخذت البركة وياك ، راح وخذ معاه عافيتي واللى فضل منها خده مصطفى معاه للسودان

فهمية : (رافعه صوتها) ربنا يديك الصحة يا آبه

البشارى : هتاجى منين الصحة وانتوا مانعين عنى المعسل ؟!.

حزينة : واه يا بشارى جيباه لصندوق الدور

البشارى : والنبي يا حزينة الشيخ يوسف ما يبشوف معسلك ده ، نقيه هو الى بياخده لنفسه بقى صندوق الدور رايح ريعه للنقيب ، الشيخ يوسف لا مستنى معسلك ولا محتاجه .أحب على يدك يعنى يا وليه ؟

حزينة : يا راجل أنت فيك نفس للمعسل ؟

البشارى : خافه عليا قوى ، يا مره أنا لسه بقوقى لو عايز أتجوز من عشيه بت أصغر من بتك فهميه ح تجوز فهمية : (ساخره) أمى خابره يا ابه،بس هى بتعافر.

البشارى : خابرة يا بت يا فهميه،أمك زى زمان قبل ما تحبيك أنتى ومصطفى كانت لما توعانى جاي من بعيد،تندسه زى العيال الى تخاف من صل القيايل!.

فهميه : لكن كنت بتحبا يا ابه ؟

البشارى : حب ايه يا بت لاقوم أكسر راس (يغازل حزينة) حزينة زي الجنيه الذهب ، يا حزينة يا حزنن يامرة دي بصاية واحدة (تنظر له حزينة وقد لانت له) مش من دي ، دول ياكشي يتخزقوا !.

حزينة: (بغضب) إكده يا بشارى ؟!.

البشارى : والله جالك يوم يا بشارى الى مرتك تستكتر عليك فيه باكو معسل بأربع بضات

حزينة : (تلين) بست بضات !

البشارى : يعني ابيض البيضتين الفرق عشان تولعلي بصاية!.

حزينة: يا بشارى ما فيش حاجه رخيصة النهارده،ألى كان بيضه بقى بعشره

البشاري : (يزيد في الغزل) ياولية ده بصاية واحدة ؟.

حزينة : (تنظر له) من دي (وتشير إلى الجوزة) ولا من دي ؟

البشاري : الشهادة لله من دي بس انا مستغناش عن دي

حزينة: أمرى لله ، قومي يا فهميه اغسلى لأبوكى الجوزة وولعليه بصره ، وهاخذ فطير بداله لصندوق الندور

فهمية : (مازحة) بصة من دي ولا من دي

البشاري : بالنسبالك اتتي تروحي تجيبي بصاية من عند مصطفى في السودان ، همي يابت

تدخل العجربة إلى الداخل

العجربة : العواف عليكوا

حزينة : الله يعافيكى.

فهمية : اضربى الودع يا خالة يحزن عليكى، طمنينا اخوى فين اراضيه

العجربة : ست بيضات

حزينة : حتى الودع غلى ، ست بيضات سامع يا بشاري ؟

العجربة : لأجل مرادك يتم

حزينة : هديكى اللى هواكى فيه

البشاري: راحت البصاية

العجربة : وشوشى الذكر

ترمى العجربة الرمل مع تغير الإضاءة ومصطفى فى الخلفية ممسكا عصاه يقوم بالتشكيل بها

العجربة : شايفاه

فهمية : شايفة ايه ؟

العجربة : وابور من حديد اسود همل وراه البيوت والعمار، ومركب حدفت ولدك هناك فى جبال سودا

والرمل الأصفرع الجنين، فى بلاد الملوك يسعى، وشمس جارية فى السما وشمس تجري فى المية، حط

على البر بسلام وفى الجو صقر خواجه حارس عليه.

فهمية : اخوى، بيعمل ايه دلوك ؟

مع جملة فهمية يختفى مصطفى وتفتح الإضاءة على منطقة أخرى يكون فيها مصطفى وعبد الحكم

عبد الحكم : (يتنهد) مش قادر، يا بوى على الغربة، عرقنا يسيل فى بلاد غريبه، ماكانش أولى يخضر غيطانا

فى الكرنك لا عسكرى يكرجنا ولا مقال يتحكم فينا.

مصطفى : ما تحسرنيش على نفسى أكثر من كده وحياة أبوك يا عبد الحكم، ما أنت خابر زين ايه الى مصبرنا ع الغربة وشمسها الحامية.

عبد الحكم : ياريت جت ع الشمس ونارها، اوعى لروحك ،الرجالة الى هايجفروا ويانا بيقولوا التعابين فى جوف الأرض كثيرة وكبيرة ، فى رقبته أطواق سوده ولا العقارب ؟
مصطفى : خايف اياك ؟

عبد الحكم : فشرت ،المبروك عطانى حجاب يحمينى من لدغ التعابين وقرص العقارب ، الحجاب بنص ريال، نص ريال ابن المفكوكة لأجل مايغمضلى جفن مطمئن قافل عنية الجوز، بنص عين كيف الديب .

مصطفى يتسمر فى مكانه

عبد الحكم : مالك ؟

مصطفى : صدق الى قال التعابين تيجى ع السيرة، حنش على رقبتهك (هم عبد الحكم بالحركة) الزم مطرحك كيف الصنم، لو اتحركت هبابة هایلوشك.

عبد الحكم : (خائفا يرتعد) شيله يا مصطفى

مصطفى : اشيله كيف، ده تعبان طريش، وفى رقبته طوق اسود، اثبت

يلكزه بجانبه بينما يقفز عبد الحكم خائفا ويضحك مصطفى بعلو حسه بينما يصرخ عبد الحكم

عبد الحكم : فرعتنى يا ولد حزينه

مصطفى : نفعلك الحجاب يا ولد سامية ؟

عبد الحكم : مفيش حد مايباش التعابين، مش خايف منهم عاد ؟

مصطفى : مصطفى البشارى عمر قلبه ما عرف الخوف، من صغرى أول ولد فيك يا كرنك عرف يطلع نخل

جباين النصارى ، أول نفر اتسبح فى الترة بليل مخافش من الغولة الراقدة بين ضلوع البحر

،فكرت بالكرنك وحكاويه، خابر الى مصبرنى ع الغربة انى شايل ويايا حاجة من ريحة الكرنك

عبد الحكم : تعيش

مصطفى : هازمك؟!، دى ريحة حد يتونس بها فى غربته (ينتزع طاقيته) عمايل يد فهمية ، والله أتوحشتلها ،

زمانها اتدورت كيف البدر فهمية فرسه عفيه شدتها على لجامى تعرف الأصول ما يترفع ديل توبها عن

الأرض ولا تفتح عينها لمخلوق، أى مخلوق كان .

عبد الحكم : رينا يستر عليها ، خبرتهم انك هاتسافر فلسطين الشام تشتغل هناك

مصطفى : قولتهم انى شيعت للرئيس سعيد وحال مايرد هسافر طوالى

عبد الحكم: والله هاتقطع فيا يا مصطفى، هاتهملني اهنه ويا العقارب والتعابين وكرباج المكاوول وتروح هناك لصبايا الشام ، عيتولوا فيها صبايا زين بيض وشعورهم أصفر وعينهم زرق
مصطفى : اهم دول اللى يلزمهم حجاب يا قريبي، هم نعاود شغلنا ونحفر البيارة اللى قبلنا خلينى انفد من دى بلد ، هم (يخاطب العمال) شد عافيتك يا واد منك ليه .

خفوت الإضاءة على مكان مصطفى وتنتقل إلى بيت البشارى ومعه فهمية وحزينة والفجرية ترحل

الفجرية : فوتكم بعافيه

البشارى : اطمننى على ولدك يا حزينة ، قلبك ارتاح، ريحى قلبى أنا وخدينى للشمس، مصطفى واقف فى شعاع الشمس، عايزه أنظره، مصطفى فى الشمس مصطفى ، ودونى للشمس
حزينة : اقليله للشمس يا فهمية، ربح روحك يا أبو مصطفى، متتكلمش كثير، ولا تقعد فى الشمس كثير، عتتعب عويناتك يا راجلي .انا راحة خلوة الشيخ يوسف وهعاود طوالى (ترحل حزينة)
البشارى : مصطفى، ميتته ترجع ؟، عسند عليك يا ولدى، عمسك فى زندك.

فهمية : ارتاح يا بوى، ارتاح ؟

البشارى : مسير الغايب يعود وضهري بتسند ، ماكنش على هواي غربتك يا ولدي ياريتي ما وافقت ، يا ما تحايلت عليه ، ومقام الشيخ كنت هوطي أقبل مداسه قولتله مسيري للتراب والبيت مسيره هيبقى من غير ضل بس أمك قالت يلمله قرشين يصلب بيهم ضهره قصاد الزمن (لنفسه) شمس هنا شمس هناك يا حزينة تقول اسكت انت الحاجة رابطانا والزمن جبار يا عالم يا ولدي هنتقابل تاني ويا عالم لو عيني توعالك مرة ثانية ولا الغربة هتقطع بيناتنا (يشعر بالشمس) الشمس نقحت فى راسي واعرة الشمس يا ولدي وديني للضل يا فهمية وديني للضل.

فهمية : لا يابا انى شديدة زى مصطفى وعتحمل اقعد فى الشمس كيف ما يقعد أخوى (البشارى يستند عليها وتمضى به لفرشته) اما يبجي مصطفى عيشيلك يا أبوى من غير ما يتعب ويكل، مصطفى شديد يا أبوى مش ولد بخيت البشارى.

إظلام من على بيت البشارى وفتحه على دكان الحدادة ومن خلفيته السوق، والحداد واقف يراقب ومن

الواضح انه ينتظر شىء ما والحدادة أخته تراقبه

الحدادة: من سواعى ما حزينة فاتت فى طريقها للخلوة وانت مش متلم على روحك

الحداد : أبأى يا خيتى ؟

الحدادة : ساحراك اياك ؟

الحداد: (متزماً) أنتى بدأتيا تقطيم ، بخاطرك.

الحدادة : على فين يا خوى.

الحداد : عاهمل الدكان ، وعاهمل الكرنك بحالة ، بدال ما أشق خلجاتى من حديثك الماسخ

الحدادة : فهمية لاهياك هى والعقر به الى اسمها حزينة ، كل ده لأجل بت حزينة يا حداد

الحداد : بت حزينة ، بت فرحانة أنى حر فى روحى .

الحدادة : ده بدال ما تجازينى أنى بحاجى عليك أنت مالك وورثك ؟

الحداد : انا خابر ايه الى عيدور فى عقلك ، أنت ماعايزانيش أتجوز : ولو تغمضى وتفتحنى تلاقى غارة جت

خدتنى ، نفسك تكوشى على كل شبر باملكه أتى ووولدك السعدى ، بزياداكى طمع يا حدادة

نواياكى السودا جايباكي لورا ، محدش عيملك أكثر من متر فى مترين

الحدادة: (مقاطعة) حاسب على كلامك يا خوى ، بدك تفضحنى قدام الخلايخ تجرس أختك ، لا يا حداد ،

الله يرحمه راجلى ما كانش مخلينى محتاجة لك لا هو حى ولا هو ميت ، مات و سابلى الى يكفينى أنا

و ولدى...

الحداد : سابلك يا حدادة وسابك ، سيبينى أنا بقى لحالى عاد سيبينى أشوف روحى أتجوز بقى

الحدادة : بت العقربة لا

الحداد : نفسى أعرف فيه ايه بيناتكوا ، شايلة حزينة وبته فوق راسك وزاعقة ليه . ما لها فهمية عاد ، معيوبة ،

مشيها أعوج ، ماهرة عفية وطالبة خيالها ورباية راجل .

الحدادة : رباية مرة يا حداد ، فهمية بت حزينة وحزينة ما عتصدق تلاقى راجل زيك لبته عنده بيت من أبوه

وورث من أمه وأبوه واخوها سارح فى أرض الله

الحداد: (مقاطعة) حزينة ما محتاجاش بيت ولا ورث ، مصطفى عينشد مكتوب كل شهر فيه جنيه واتنين

وتلاثة كمان i راجل بته الحداد وبينته ودكانه وماله وورثه ، حزينة راسها لبعيد ، وانت بتقرا فتحتها يا

سيد الرجالة ح تحط يدك فى يد مين ؟ الراجل المخترف البشارى ، ولا حزينة يا حداد ، تحتط

يدك فى يد مرة ؟

الحداد : (يراقب) أبأى يا حدادة ، رجعتى لحديثك الماسخ تانى ، اسمعى يا بت أبوى عاتجوز بت حزينة يعنى

عتجوزها وعاكلهم أمها النهاردة جبل باكر والى عندك أعمله يا حدادة

تعب حزينة من أمام الدكان فينادى عليها الحداد

الحداد : خالة حزينة ، خالة حزينة ؟!

حزينة : مرحب بك يا حداد ، كيف الحدادة ؟

الحداد : بخير يا خاله ، عندى كلمتين كابسين على نفسى وكاتمين على قلبى بدى أبوح لك بيهم ؟

حزينة : خير يا حداد.

الحداد : طالب يد فهمية واتى خابرة زين كل حاجة عنى المسألة ما محتاجاش سؤالات عنى، إحنا ناس

بعضين ومصطفى عندى كيف الأخ ونعم الصديق، قلت ايه يا خاله انا متعجل فى الأمر

حزينة : فهمية أبوها البشارى زى ما عارف ما دريانش بروحه، المرض بيده يوم ورا يوم ، والأمر محتاج مشورة أخوها، نشيع نجيب الموافقة..

الحداد : ربنا يشفى أبو مصطفى ، يعنى ميتته تبعنى المرسال ويوصل الرد ؟

حزينة : أصبر يا ولدى إن شاء الله تكون من نصيبك، فتك بعافية (تهم بالخروج)

الحدادة : حزينة، حزينة ؟

حزينة : كيفك يا حدادة، ما سمعاش ضوتى اياك، .دلك طالعة ترحبى بيا وأنا قدام دكانك ؟

الحدادة : عنرحب بيكى فى دارنا أما تاجى تزورينا مش فى السكك كده .

حزينة : سكك، سكك ايه يا حدادة،

الحدادة : الكلام يكون فى الدار يا حزينة، مش ع المصاطب و فى السر بينك وبين أخوى لأجل تخطفيه

الحداد: (مقاطعاً ممسكاً بالمطرقة) خشى جوه يا حدادة ، خش جوه واقصرى الشر

حزينة : شر، .جوازك من بتى شر يا حداد، .بلاش منيه فتكم بعافية

الحداد : أنا ما قصدكيش يا خاله، الشر مش من يتمك، الشر أنى عارفه وخابره زين، خش جوه يا حدادة،

سابق عليكى المصطفى لتقصرى فى الحديث وتهملينا عاد..

الحدادة : داخله يا حداد، داخله يا حزينة

تمشى حزينة

الحدادة : والله وعرفتى يا حزينة وابنتى وبتك إزاي تملكوا قراريط وبيوت .

من مكان آخر تفتح الإضاءة على المقاول وهو يكتب الجواب لمصطفى وفي الخلفية العمال وهم يقومون بحفر

البير ومصطفى يبدو عليه القلق

مقاول : ايه الى مكدرك يا مصطفى، ماتقول ناوى تكتب إيه ؟

مصطفى : يا مقاول همل الجواب دلك ،البيرالى رايدة الخواجة اليهودى حفرناه،رايد يغوطه ليه ؟

مقاول : كلام الخواجة اليهودى أمر وانا عبد المأمور قال غوطه تبقى تغوطه ،

مصطفى : اتفاننا نزل اربعة متر بيارة فى الأرض وأدينا حفرنا والمية بتروى ارضه دلك ،نغوطوا تانى اتنين متر

ليه

مقاول : هتناكف اياك.

مصطفى : السقالات ضعيفة يا مقاول ولو غوطنا أكثر من اكده هايقع فوق نافوخنا.
مقاول : كله بتمنه

مصطفى : وارواح الخلايق الى البير ممكن يوقع فوق نافوخهم ليها تمن يا مقاول ؟
مقاول : قولتلك هو أدري،وبعدين هو قالى انه هايزود فى القرشينات كرامة للحفر الزيادة ،واسمع يابن والدى،احنه اهنه جاين نشتغل ويس،هاتلاوع وياهم يرحلوك، وقتها مليكش ديه،اشتغل ويس يا مصطفى وخلصنى قولتلى اكتبلك جواب قولت ماشى ، ماتوجعش راسى وحياة ابوك خلينا نعاود نشوف شغلنا عاد

يدخل عبد الحكم مسرعا

عبد الحكم : الرجالة بتسأل نغوطوا البيارة ولا نمشى على اتفاقنا القديم
مصطفى : (ينظر للمقاول) احفروا ثلاثة متر زيادة وخليك وياهم
عبد الحكم : لكن
مصطفى : (بثورة) ملكنش يا عبد الحكم ، بزياداك مناكفة ، الحاجة قال تغوطوه يبقى تغوطوه واللى كان ليه قرش بقى اتنى

ينصرف عبد الحكم رغما عنه

مقاول : زين ما عملت ، كده تعاود للكرنك شايل ومعنى
مصطفى : وصلنا لفين يا مقاول ؟
مقاول : ولا وحشة اشد من وحشة الغريب المنقطع بعيد عن الاهل والاطوان.
مصطفى : قولهم انى اتوحشت طلع النخل، اتوحشت مية النيل بعد زوال الشمس ،لولا الحوجة مكنتش هملت عتب الكرنا ولا خطيته برجلى، اتوحشت كل ركن فيه ، اتوحشت للعلق السخنة الى كنت هاديالك يا فهمية، اتوحشت بصتك يامه كات بتوتى فى جلدى، وابوى البشارى ربنا يديله طول العمر، قولهم ان الحال ماشى وانى بعت اتنين جنيه و كمان سبوع هاشدلكم جواب فيه اتنين زيهم.
منزل بخيت البشارى وبالتحديد الإضاءة الخلفية على وجه البشارى الذى يبدو أنه محموم للغاية وفهمية بجانبه البشارى : الشمس ، الشمس وعرة قوى ، أنقلونى للضل ، هاتولى مصطفى ، مصطفى واقف تحت الشمس ، نارها واعرة عليك يا ولدى ، ابوك يا مصطفى مسافر ، ارجع ضلل على بيتك م الشمس يا ولدى ، أرجع لحزينة، ما تهملش الدار من غير راجل يا ولدى .
فهمية : يا مرك يا فهمية . . يا مر أيامك وسنينك، لسه محموم ، جتته قايدة نار يامه.

تذهب حزينة إلى البشارى وتتنظر وكأنها تنتظر ملك الموت التى تعلم أنه حضر ومعه يتم التناوب بالإضاءة علي المناطق المتفرقة بالمسرح والبير علي شفا الإنهيار

البشارى : عاروح اشم البخور واذكر وأشرب المعسل وعاكل اللحم عيشد عضامى، عتبقى متينة يا حزينة وعارجعلك زى زمان، كنت بسد خشمك، دلوقت بتنهشى فى لحمى كيف الديب

فهمية : والعمل يامه؟! ده لا دارى بالدنيا ولا باللى فيها

حزينة : همليه يقول اللى فى قلبه، يقول كلمتينه ، سيبه ، أبوكى ماهواش محوم، همليه يقابل ضيفه

البشارى : البير يا مصطفى اوعى لروحك م البير يا مصطفى

تفتح الإضاءة علي مناطق المسرح الحداد والبير وتجسيد شبح الموت الذي يرمي بظلاله علي المسرح

مصطفى: (من الجانب الأخر) الرجاله يا مقال، السقالات بتوقع ورجالتى فى البيارة تحت

الحداد : هاتجوزها يا حدادة والى بدك تعمله اعمله

مصطفى : حد يغيتهم يا خلق

الحدادة : بخاطرك يا حداد

فهمية : أبوي يامه

تمسكها حزينة بقوة مانعة إياها من الحركة

عبد الحكم : ألحقنى يا مصطفى ؟

تمسك حزينة بعينى فهمية كى لا ترى ملك الموت الذى حضر للرجال والبشارى

البشارى : اوعى لروحك يا وليدى

مصطفى : حد يغيتهم يا خلايج ، رجاله اليهودى واققين

المقال : كنك مش شايف، اربع للقمة عيشك يا قريبي.

مصطفى : (لاظا أنفاسه الأخيرة) كيفك يا شيخ يوسف .

فهمية: (صارخة) ابا

إظلام—،،

التغريبة الثانية

الخلفية مازالت مظلمة، ومصطفى جالس في منطقة إضاءة، والحزن كأنه صورة تشكيلية يخيم على البشارى
أثناء غسله ودفنه، وخطابات بين مصطفى وبين أهله علي طقس الدفن في المنتصف
الحدادة : كتبوا على عنوان الرئيس سعيد بفلسطين وطلبوا منه أن يسلمها لمصطفى بخيت على عجل، قالوا في
الرسالة

عبد الحكم : انتقل والدكم من الدار الفانية إلى الدار الباقية تجمل بالصبر يا ولدى، الدوام لله وحده وكلنا إلى فناء
مصطفى : لم اصدق ولن اصدق والدى الحى لكنه بعيد واتم بعيدون، وتلك إرادة اله كان يجب على ان اراه قبل
ان يرحل، مؤسل لكم مال لتقوموا بواجب الميت والدوام لله وحده ولكم طول العمر وانا لله وانا اليه
راجعون

يتحول المشهد لعرس فهمية والحداد في حضور الجميع والخطابات مازالت ساريه

الحدادة : أملت حزينة على فكتبوا
حزينة : طلب الحداد الجبالى يد اختك هيمة، أجلنا الرد حتى تصل منكم الموافقة الحداد حسن السمعة طيب
المعاشرة يملك بيتا من والده المرحوم الجبالى

حزينة : وافق مصطفى على زواج اخته من الحداد وارسل المال مساهمة منه في تكاليف العرس وقال
مصطفى : لو كان بمقدورى ارسال أكثر من المبلغ المرسل لأرسلت واله أعلم، يعينك اله يا أمى على مطالب الحياة
التي أعرف أنا قاسية.

الحدادة : تهلل وجه حزينة وكساه الفرح ودعت لمصطفى بطول العمر وطوى الشيخ فاضل رسالة مصطفى
ولمخ كتابة على ظهر الورقة فقراً
مصطفى : ربطنى العيش والملح بأسره شامية لها بنت هى عين العقل ووجه القمر، ربما تم زواجى فى القريب
العاجل

البشارى : واضحة شمس هذا النهار والحق مثلها واضح لا ايهام فيه غطى التكدير وجه حزينة
حزينة : إتجوز

البشارى : هكذا تأتى العاصفة وتعصف بالبشر ، بعد أن رحل عنهم الضل ، وذاقوا نار الشمس
يقوم الحداد باللباس فهمية لإسورة فى يدها، فى حين تظهر فى الخلفية وكأنها طوق
لتستمر الأحداث.....

بيت البشارى

تجلس حزينه أمام الطحين لتجد فهمية تدخل عليها وتجلس صامته

حزينه : ايه حكايتك يا فهمية ؟ ، من تالت يوم جوازك يابتى مايطلعش نهار إلا وألاقيكى فوق دماغى ، وكلها هبابه وألاقي الحداد جه فى رجلك ،
فهمية : أصل ...

الحداد : صbam الخير يا خاله

حزينه : أهلا بجوز بتي ، إيش جراك يا حداد ، من زمان محدش شافك

الحداد : إتنى بتمقلتى علي يا خالة حزينه ؟ (غاضبا)

حزينه : بضحك معاك يا ولدى ، بيتك ومطرحك تاجى فى أى وقت ، بس الى مستغرباله مرتك تخش من هنا وهبابه وتخش وراها ، طب ماتجوش ويا بعض ليه ؟!.

الحداد : (مرتبكا) أنى سبقت ع الدكان لقيت الحال واقف ، قلت أجى أشرب الشاي ويأكي ، وأهى الحدادة فى الدكان

حزينه : بيتك ومطرحك ، أروح أعملكوا الشاي (تتحرك حزينه وتركها معا)
فهمية : خبار يا حداد ؟

حداد : أنى الى خبار عاد ؟ من سواعى ماتجوزنا واتتى بتدلى حدى أمك يوماتى ، مشاويرك ليه كترت يابت البشارى ، ده بدل ماتقعدى فى دار جوزك .

فهمية : مانت سواعى النهار فى دكانك ولبيل قاعد فى الغرزة تنضغ الحشيش والأفيون وترجع نصاص الليالى مش قادر تصلب طولك ، رايدنى أقعد فى الدار أعمل إيه و وشى فى وش الحدادة ،
أديني باجى لأمى أتفك وياها بكلمتين

حداد : كلمتين أياه الى بدك تتفكى وياهم مع أمك يا فهمية ؟

فهمية : ليك دخل بكلام الحريم عاد ، ولا الحدادة دست سمها فى عروقك ، فجأى تسم بدننى فى بيت أبوى يا حداد

حداد : جيت أهاديكى (يخرج أسورة يعطيها لها)

فهمية : أنى ما رايداش دهبات ...

حداد : بخاطرك يا بت البشارى ، بس راجلك عليكى ليه طاعة ، من دلوك وطالع مرواحك لأمك مايقاش يوماتى وملكيش دار غير دار الحداد ، جوزك الى داره التراب مش كاسيها ولا قشر التوم مالى أرضها ، جوزك الى هايكيسيكى بالذهب

فهيمه : قولت مارايداش دهبات

حداد : (يشدها بين يديه) نفسى أشم فيكى ريحتى .

فهيمه : وفين ريحتك يا راجلى ؟

يدفعها بعيدا شاعرا بالمرارة وبهم ناحية باب الدار

الحداد : تخلصى مع أمك وتعاودى لدارك ، ولينا بيت نتعابوا فيه يا بت البشارى (يخرج)

حزينة : (أحضرت الشاى) فين جوزك يابت ؟

فهيمه : مشى يامه

حزينة : إيه الى فى يدك يا فهيمه

فهيمه : مجايب الحداد

حزينة : ولسه شكلها طاقة القدر وافتحت ، يا هناكي يا حزينة

فهيمه : (تبكى) يا مرك يا فهيمه

حزينة : فيه ايه يابت ؟

فهيمه : مفيش يامه !.

حزينة : ياك مفكرانى هبلة ولا عبيطة ، جية الحداد وراكى كل شوية ماتطمنش ، أرمى الى جوفك

ياما قت على الراس طبول أنا أمك الى ملكيش غيرها ، سترك وغطاكي لو استحييتى من

الناس كلاتها مش هاتستحي منى ، فضفضى يابتي انا امك.

فهيمه : الحداد يامه !.

حزينة : بيبضربك يا فهيمه ؟!.

فهيمه : ياريت بيبضربنى يامه، (تبكى) كل ليلة يطفى اللنضة الصاروخ ويضمنى بين ذراعاته ، قلبه ينهش

فى صدره، وكن سلسلة حديد مقيداه وأشوفه يصرخ ويزعق من غير حس بس يزوم ، كنه

طالع جبل وشايل فى حمله حجر سارق عافيته، ويتبلل فى عرقه لحد ما يهدم وأول محاجى عليه

يقعد يبكى كيف العيل الصغير.

حزينة : وساكته الوقت ده كله ، ماقلتيش ليه والله انا كان قلبي حاسس ، يا شقاكى يا حزينة ،
(لنفسها) والله وسمك بدأ يرعى يا حدادة .

فهمية : مفهماش يامه ؟!.

حزينة : جوزك مربوط يا فالحة.

من الناحية الأخرى الفجرية مع الحدادة تستمع لها

الحدادة: ولو خلف ؟!.

الفجرية: يخلف كيف واتى مسطرة عليه وسواسه ؟ ، الحداد ممنوش رجا والعمل اللي سويتهولك ؟!.

الحدادة : من يوم جوازهم وأنا بملس بيه ع القادوم والسندان .

الفجرية: طول ما القادوم بيدك بيدق بيه علي السندان مرادك هيتم لا فهمية تخلف من الحداد ولا حزينة تورث فيه.

الحدادة: لو تم مرادي هكسيكي بالذهب

الفجرية: مرادك هيتم لو ربطناه باللسان والفعل، اللي رابطة الجن في شهر تربطيه يا حدادة بلسانك في يوم ،
(بشيطانية) شنعي عليها شنعي علي الارض اللي بدك تبوريها ، خنسي في ودنه خنسي في سوق الحرير
وسيبي الباقي عليهم (تخرج) الوسواس لو صاب راجل حناه، زمان عملتها مع الضاحي دلوك الدور علي
بت حزينة.

الحدادة: مرادي حزينة مش بتها ياولية

الفجرية : بالمية دي يوماتي تطفي بيها نار الحدادة ، وأوعاكي تنسي اللي بيناتكوا.

الحدادة: الحدادة متنساش، من وقت الضفاير كنا سوا زينة البنات في عين الضاحي عريس ملو هدومه، كانت
اجمل وأحلى جوازة كنت هافقدها ماشفعليش غير مال ابويا واتجوز المال المال الضاحي اتجوز مال ابوي
ما تجوز نيش على فرشتي كان بيناديني باسم حزينة خرجت كسبانة وبكتييير.

الفجرية : وبعد ما مات ورثتي الضاحي .

الحدادة: دلوقت هتلف على مال أخوي واد الحداد هو الكسبان وحزينة تورث فيه والربطة بيناتنا لآخر العمر

راسي براسها عقربة هتلف على حية (تتزع من يد الفجرية وترش المياه ع الجمر) بيني وبينك يا حزينة

جر مايطفهوش الا اما اوعالك واتي خارجة ببتك من دار الحداد

من الناحية الأخرى حزينة مع العراف

عراف : السائل من صلب راجل كامل القدرة من رجال الجن ، واحدة من بنات الإنس عايزة الحداد لنفسها ،

قامت سلطت عليه وسواس يضعف القدرة .

حزينة : واحدة من دمه يا شيخ ؟

عراف : (يقرأ الطالع) خط الدم واصل بينهم ، امه ؟ ...

حزينة : أخته .. هي الحداة ، هسيبها تأكل مال بقي ؟

عراف : المال مربوط بالخلف .

حزينة : والخلف رابطاه الحداة .

عراف : يبقي السؤال يا بت حوا ، رايدة الخلف لبتك ولا القدرة للحداد ؟!

حزينة : ما ع تفرقش ، الحداة ناوية علي موتي .

عراف : لا تفرق ، لو رايدة تفكي المربوط فليكي معاي وصفة ، تفكي بيها المربوط ويرجع من غيته وضلاله ، ويدفي فرشاة بتك ، ولو رايدة الخلف تلاقيه ورا باب حارساه مساخيط الكباش ...

حزينة : (وقد فهمت ما يحاول أن يرمي إليه) المعبد ؟

عراف : ورا بابه الفرج لبتك .

حزينة : فهمية جوه المعبد ؟

عراف : مقبول عليها باب ، ويا مسخوط حجر فرعون ، مسخوط تتبارك بيه النسا اللي اتقطع وصل سلسالهم ، جاوبي يا بت حوا الخلف ولا القدرة ؟ خناسك ذلك علي ايه ؟

حزينة : المعبد لا ، حللي ربطة الحداد .

عراف : إطحني اللفة دي دقيق ناعم ويترمي تحت فرشاة المربوط ، السائل من صلب راجل كامل القدرة من رجال الجن ، مرة المربوط هاتخط نقطة منه في حالة مية طاهرة يسبح بيها العليل ...

تدخل حزينة بيتها وهي تردد

حزينة : (مكمله) وتحفظ مرته المية ، ست أيام تكرر نفس الفعل ، ، وقبل طلوع شمس اليوم السابع تتسبح مرة المربوط بالمية اللي جمعتها في الست أيام وتقبله في فرشته ، يا مرك يا حزينة لو المراد متمش .

وسواس : (يخنس) المعبد القديم المشيد من الحجر الكبير ، من فوق كل بوابة تطل شمس ذات جناحين يحيط بها ثعبانان حارسان .

حزينة : (موسوسة) المعبد لا ، أطجن اللفة دقيق ناعم يترمي تحت فرشاة المربوط ..

وسواس : بالداخل رب النسل المكشوف العورة المحبوب بغرفته الضيقة والمسلة التي لم تكتمل .

حزينة : قبل طلوع شمس اليوم السابع تتسبح مرة المربوط بالمية اللي جمعتها في الست أيام وتقبله في فرشته

يتجسد وسواسها تجسيد راقص علي خيال الضل في الخلفية لفهمية والحداد في أحضان بعضها البعض ومن ومن جانب آخر يدخل مصطفى ليجد أن التجسيد لزوجه الشامية تخونه ولا يقدر علي فعل شيء

مصطفى : قريبك هايقعد ينطلنا كل شويه ؟
الشامية : بياخد بحيب في البيت ، أحسن مانت مقضيها صرمحة ومش مراعي بيتك .
مصطفى : أديني بجري ورا لقمة عيشي .
الشامية : لحد أمتي ؟ لا تجارة فالح فيها ولا بيت قادر علي مصاريفه ، ، وبدل البيت فاتح بيتين ، واحد هنا وواحد في الكرنك .. وياريتك مكفيهم .
مصطفى : لساي مصطفى ماتعريتش ، مصطفى اللي كلامه نافذ علي اربعين راجل ، مش هاتعصي عليه مرته ، هيا كلمة ، الراجل ده ميعتبش الدار في غياي ..
الشامية : الدار داري ، أنت اللي زرعة غرست في أرضنا و أدينا بنرها .
مصطفى : ليا فيها مرة وإن اتعوجت أعدلها .
الشامية : (رفع يده لتمسكها في تحدي) تدل مين ؟ أنت هنا أجري .. و أجري خايب ، جيتلي من السودان صعلوك .. دفن صحابه تحت الرمل ، باعهم بلاليم والباقي من البيعة كوايس تخترف بيها وانت نايم ، فرشتك فاضحاك يا سيد الرجالة ، زرعة راعيتها من مالي اللي أدتهولك تتاجر بيه خسرتة و أدبك شغال عند الناس كنك يا بو زيد
مصطفى : بدك تغلعيها .
الشامية : مدام معاجبكش هوانا ولا ميتنا ولا منك رجا ، بينا الامر بالمعروف ومنفعش ، مفضلش غير التسريح بإحسان .
مصطفى : أفضحك .
الشامية : تسلم البطن اللي جابتك ، واللسان ده اللي بتأمر بيه في الاربعين راجل ، طلقني وكله بتمنه .
مصطفى : (يبكي وهو يسكر) البشاري غمر قلبه ماعرف الخوف ، من صغري أول ولد فك يا كرنك عرف يطلع نخل جباين النصارى ، أول نفر اتسبح في الترة بليل ، مخافش من الغولة الراقدة بين ضلوع البحر

ليتسلم الحداد الزجاجة ويتحرك قاصدا بيته فتقابه الحدادة

الحداد : مين ؟

الحدادة : اني الحدادة يا حداد ، فيه حاجة يا خوى ، بقينا بعد العشية ايه الى قالك منامك ياخوى

الحداد : انى ، انى عتونس مع مرتى (متدمراً) عتونس فيها حاجة دى

الحدادة : ربنا يجعله بفايدة ، تسمى بالخير ، ما تنساش تطفى اللمبه ، الجاز بقى غالى

بيت الحداد

مسرحية (طوق) - عن رواية (الطوق والإسورة) - صياغة ودراماتورج : محمد علي إبراهيم

فهمية : وبعد هالك يا حداد، حول عدا واللى وراه قرب يفوت، وبعدين يا حداد، واخرتها ياراجلى حداد: أسود، أسود يا بت حزينه، ملقتيش غيره تلبسهولى فى الليل، مافيش غيره عاد ،

فهمية : اللى لقيته سليم من خلا جاتى.

حداد : اسكتى يا مرة لأقطعها لك هى كمان

فهمية: تقدر يا حداد، تقدر تسد خشمى، تجرنى من شعرى وتمرغنى فى تراب الدار لكن معتقدرش تمسك لسانات الخلق معتقدرش تجر حريم الكرنك كلاتهم وتمرغوا فى تراب النجع لجل يیطلوا يجيبوا فى سيرتى ،سبرة مرتك يا راجلى،

حداد : قلت لك اقللى خشمك عاد، بزياداك حديثك اللى عيول فى نافوخى كيف النار، بكفايتك خطرته، محومة اياك،.

فهمية : اقطع لسان العقربة اللى عتسمينى المعيوبه، الأرض البور يا حداد يي اسمع يا حداد تلبس خلاجاتك وتروح تقطع لسان العقربة الحدادة اللى دايرة بيه فى النجع تشنع بيه على واسمى ما عتنتقوش واصل ،

الحداد : أخرسى يا حرمة (**يزيحها فتسقط على السرير**) جه اليوم اللى ترفعى فيه حسك على راجلك، . اليوم اللى الحداد عياخد فيه أمر من حرمته، البس خلاقاتك يا حداد، روح للحدادة يا حداد، اقطع لسان العقربة يا حداد، اسمعى يا بت حزينه، الحداد راجل، ايوة راجل وسيد الرجالة كمان، عيصرف عليكى، عيقطعلك هدمه ويشترى عشرة غيرها عيصرف عليكى وعلى أمك، على حزينه يا، بت البشارى

فهمية : أمى عيصرف عليها مصطفى، عيشيع كل.

الحداد : مصطفى معيشيعش،نوبه مرته سقطت، نوبه اللى عيشتغل حدهم غدروا بيه، وكل ما بيعت يقول لولا السبب قهرى كنت بعت المعلوم، مصطفى ماعيشيعش، ويبت حزينه مفتوح من خيرى، واللى كان هایشيل حملها عويل فى بلاد الغربة.

فهمية : اسكت

الحداد : الحقيقة يا بت حزينه أن مرته وسخت فرشته مع راجل من جنسيها ،ولو ممدقاش أجييلك عبد الحكم يقولك مرته سوت ايه على فرشته، جابت شامى زيبا، والعويل طلقها يا بت حزينه طلقها وبس .يا بت حزينه

فهمية : اسكت يا حداد، اسكت، كمان، كمان سيرة مصطفى عتطولوها مصطفى مصطفى لو مرته حملت كده عيجز رقتها، مصطفى فارس، راجل يا حداد،

الحداد : راجل ، راجل في دماغك وبس ، فارس عاد أبو زيد الهلالي ، أبو زيد الى عتخرفي بيه وانت صاحيه وانت نائمة ، أبو زيد الى عتخكي عنه للصبايا عند التربة وانتوا بتلموا الزلع ، أبو زيد قال ، راجل عاد ، مالكيش راجل غير الحداد يا حرمة ،

فهمة : عشان ما تصرف على عاد ، راجل عشان ما بتصرف على حداد ،

الحداد: (يمسكها من جلبابها ويهم بمزقه) قلت لك لى لسانك يا بت حزينه ، حطيه جوه خشمك وما يتطلعش واصل

فهمة : ماعتفرقش لحمك بان على الخلايق وعرضك انكشف ، مرتك ماهياش مستوره في عيون الناس يا حداد ، والعيب منك انت يا راجلى ، (**تقلت منه**) قطعها يا حداد ماعتفرقش لحمك بان على الخلايق وعرضك انكشف ، مرتك ماهياش مستوره في عيون الناس يا حداد ، والعيب منك انت يا راجلى

الحداد : إخرسى

في منزل البشارى تدخل فهمة على امها باكية

فهمة : إلحقيني يامه ؟

حزينة : فى إيه يابت ؟

فهمة : الى عايزة حش بطنها الحدادة ، عمالة تلف وتدور وتلا البلد أنى أرض بور بتقول أنى عاقر يامه **حزينة :** قطع لسانها ، وأخوها الحداد ساكنها ؟

فهمة : الحداد ولا دارى بالدنيا ولا الى فيها ؟ الحداد سايب دكانه بالنهار كله وقاعد فى غرزة توفيق يشرب الحيش وينضع الأفيون ، ينضر لى راحة واللى جاية واللى يشوفه يقول مقطوع السمكة وديله مش عارفة إذا كان بيكذب على نفسه ولا ع الخلق

حزينة : وبعدهالك يافهمة ؟ نفسى تجبرى خاطرى بحتة عيل تخرسى بيه الحدادة والبلد كلاتها

فهمة : وأجيبه من وين العيل يامه ؟ ما فيش شيخ ماسقهوش عليه ، مفيش طريقة مجرتهاش ، وياريت فتحت خاشمى ، إلا حاطة فيه ميت مركوب وساكنة ، والحدادة ماسايبانيش فى غلبى

حزينة : يمكن صح العيب عندك

فهمة : مش معقول مفهياش يامه ، الحداد ماقريليش ولا عمره هايقريلى

حزينة : (**تنكرها بعنف**) يعنى إيه ، هاتطلقى ، جوازة وأنحسبت ، تاجى تنامى فى ريجى بضاعة وبارت ، الحدادة هاتضحك على وتكوش على قراريط الحداد هى وولدها السعدى ، لا ، لا ، مبقاش باقى غير المعبد ، هو المعبد

فهمة : المعبد ؟!.

تقوم الإضاءة بالتركيز علي حزينة وفهمة وإظلام باقي المسرح

حزينة : (موسوسة تردد) المعبد القديم المشيد من الحجر الكبير ، من فوق كل بوابة تطل شمس ذات جناحين يحيط بها ثعبانان حارسان .

فهمة : المعبد لا يامه ، أحب علي يدك لا .

حزينة : (تزيح الأم بثبات ملابس إبتها التي تقاوم لكن حزينة تمسكها بثبات دامعه) بالداخل رب النسل المكشوف العورة المحبوب بغرفته الضيقة والمسلة التي لم تكتمل

تدفعها إلي الظلام لتسمع إبتها وخلفية موسيقية مناسبة للأم الممسكة بملابس إبتها وهي تنهار ببطء

فهمة: (صوتها مدعورة) ايه دى، ايه اللى بيطير دا، خفاش، خفاش يامه عيلزق فى الوش، الحقونى يا عالم، الحجر عيتحرك، .عيقرب م) ،لا عتمسكينش ،معتلمشش شعرة منى واصل،مش قادرة عاد، مش قادرة أهرب أكثر من كده. اهرب فين، اهرب منه لفين الحقينى يامه، الحقنى ا مصطفى (تطلق صرخة مدوية) آه، آه يا مه الحجر بقى راجل، آه يده عتلف رقبتى كيف الطوق، عتنزل على صدرى، الحقونى ،الحقونى ما قادرش يامه ماقدراش.

مع كلامها يتم التضفير ويتسارع الأيقاع والشبح الأسود يسيطر عليها حتي تخرج إلي أمها التي تفتح ذراعها ممسكة إياها وقد فارقتها البصر من هول الموقف فأصابها العمي

إظلام

التغرية الثالثة

شخصيات العرض واقعة من جديد على مستويات مناسبة

البشارى : له التدبير الأعلى أرسل الموت فى صورة خنجر بيد مجوسى خسيس إلى ابن الخطاب وهو أمير المؤمنين ورمى النطفة فى بطن فهيمة فإذا بها حبلى بعد عام ونصف من زواجها بالحداد ، مكرت حزينة لكن الله خير الماكين ، وهاهى حزينة تجنى الثمرة ، لقد خرجت فهيمة من بيت الحداد طالق بالثلاث ولم يشفع لها عند الحداد أنها حامل فى شهرها الرابع ، وكتب **مصطفى** : وقع الأمر المكروه من الله والناس بالطلاق الذى لا رجعة فيه ، انفصلت شقيقتك فهيمة عن الحداد

البشارى : ظلت حزينة تنتظر الرد بفارغ الصبر تصارع الوسواس فى اليقظة والكوابيس فى المنام خوفاً من أن تقتل الظنون السوداء ابنها فى بلاد الناس البعيدة لولا جاء رد مصطفى على الرسالة ، بالرسال مال ووصية

مصطفى : نصف المال لابن فهيمة المقبل ، لو جاء ولد سموه البشارى
لتبدأ النهاية

طرق الكرنك

الحدادة : كيفك يا فهمية ؟

فهمية : (ممسكة ابنتها) بخير

الحدادة : كويس إني عترت فيكى قصرقي على المشوار ، أدى الريال ده لأمك؟!

فهمية : وأبوها مجاش

الحدادة : خدى الريال وسريه فى عبك ، الحداد لا هياجى ولا بده يشوف بته ، حبال الوصل بيناتكم

أنتقطعت وموصلهاش إلا القاضى وحكمه ، لولاه مكتيش هتطولى مليم م الحداد

فهمية : بتى هايصرف عليها خالها.

الحدادة : قولى الكلام ده حزينة،الى كعوبها نشفت من القعدة فى المحاكم ، سمعت أن عينها الشمال

بقت بعافية

فهمية : تشمتى فى المرض يا حدادة .

الحدادة : ريك مايسيش يا بت حزينة ، كل حى مننا فى قلبه ذنب هينش فيه لحد ما ريك يقضى ،

أمك علية فى دارها وملكيش غيرها ونس بعد الحداد ، خدى الريال.

فهمية : لا .

الحدادة : (ترميه) طلع من زمتنا .

ترمى الحدادة الريال على الأرض وتبصق لتمشي تاركة فهمية التى تنظر إلى وتمشى نذلولة وقد أحست

بكسر نفسها وتنزل لتأخذ الريال أثناء طرق الحداد الذى يفضى إلى ثورة والحدان علي المسرح في

آن واحد ثم خفوت علي فهمية وهذأت ثورة الحداد ببكائه لتدخل عليه الحدادة

الحدادة : بتبكي يا حداد؟

الحداد : عطيتى فهمية الريال ..

الحدادة : قابلتها فى السكة كانت شائلة بتها ووشها عليه غضب ربنا ، كن العافية هربت منيه

الحداد : (لنفسه) كانت بدر فى تمامه ، لحد ما هوبت عتبة دارى .

الحدادة : لما هوبت ناحية المعبد.

الحداد : ماراحتش ، وبت فهمية بتى ، من صلبى

الحدادة : طب قولى لما هى من صلبك ، وفهمية شريفة وصايناك طلقته ليه ؟ ، دانت كنت ميت عليها ، إيه الى بدل طبايحك عاد ؟ مرتك ، قصدى الى كانت مرتك كانت هى وحزينة هايعملوا ايه فى المعبد قبل ماتحط الى فى بطنها ، فيه ايه المعبد يا حداد ، الحريم الى ع تروح المعبد هاتروح ليه يا سيد الرجالة ، بدل ماتمتع قوى وتنفخ ريشك وتقول بتى كان حقك قتلته ولا رميتها فى النار الى بتلين فيها حديدك يا حداد

الحداد : أرحمىنى يا حدادة ، دانا أخوكى

الحدادة : عشان أنت اخوى ماعياش عيل إنت ملكش صالح بيه ولا تعرفوش يبقى أسمه على أسمك وحزينة وبتها يورثوا فيك

الحداد : هو ده مربوط الفرس.

الحدادة : اتجوز يا حداد .بت الصياد اتجوزت قبل كده وسقطت يعنى صاخ سليم يا حداد.

الحداد : بدك ايه منى تانى يا حداده.

الحدادة : بدى أصدق إنها من صلبك .،أتجوز والعمر ينفوت ما عيفوئش حول، حول ونصدق، خلفت بت الصياد ويبقى الجوز ولادك، ما خلفتش يبقى نغرق نابت وعش على روح أبوها الى منعرفهوش ، قلت إيه يا حداد ، أروح أقرى فتحته.

الحداد : (مستسلما) الى هواكى فيه أعمله يا حدادة .

نقل بالإضاءة على حزينة وإبتها اللتان تجلسان وفهمية صامته يبدو عليها آثار الإعياء بينما حزينة تتحسس الأشياء التي بعثها مصطفى

حزينة : وحياة النبی البنت نبوية دى رزقها واسع ، تانى يوم اتولدت مصطفى بعث الى عمره مابعته من يوم ما سافر ، فلوس وخلف وشى وشويات وباعت يسأل ميتته هاتولدى جه مرساله كانت البت فى يدك

فهمية : ما قدرهوش ربنا يا جى يشوفنا ، أبويا مات ماشفهوش ومجاش بعدها ، أتجوزت مجاش يكبر بيا ، إتطلقت مجاش يكون سند ليا ، وأدبنى ولدت مجاش يشوف بت أخته ، إحنا ولاية يامه وبيتنا الى كان ضلالية عمرانة إتكشف لنار الشمس.

حزينة : أمك بميت راجل يا فهمية

فهمية : لما قالوا يا راجل قالوا ضل ، ضل يامه مكنتش وطيت لفلوس الحدادة وهى ع ترميها الى ع السكك

حزينة : حقها وأقل من حقها بكثير ، ولسه يا حدادة، حجر جرك فى المحاكم وعاهد حق البنيه منك تالت ومملت. مش بته عاد؟!.

فهمية : بته، ساحنى يارب؟!.

نقل على بيت الحداد وقد هم بنت الصياد ليجد نفسه مازال ضعيفا

راوية : وبعدهالك يا حداد؟ وأخرتها يا راجلى .

ينظر لها الحداد ويضحك

الحداد : راجلك؟! ، أنا لا كنت راجلك ولا راجل فهمية

راوية : يعنى إيه ؟

الحداد : الى أتجوزتیه أهو قدامك

راوية : ضحكتموا على أنت وأختك

الحداد : أنا مضحككش على حد ، حتلاقى دهبات خديها كلاتها .

راوية : انى ماريداش دهبات

الحداد : (منفعلا) آمال رايدى منى إيه؟

راوية : حزينة وبها الى رابطينك فهمية خلفت منك ورابطاك لأجل ما تورث فيك

الحداد : مخلفتش ، فهمية مخلفتش منى

راوية : والبت الى بيناتكم ؟

الحداد : خبرتى ليك بضحك دلوك ، كل الى كان كاسيه التراب جيتى وكشفنيه يا بت الصياد ، لا

الأخت كانت أختى ولا المرة كانت مرتى ، ولا البت من صلبى وعلتى ورثتها بجوازنا يابت

الصياد ، ورث ودائر من بت البشارى لبت الصياد ، طوق وكلنا متسلسلين فيه ، طمعتى

وأديكى ورثتى ، اشتريتى بيعة خسرانة ، الحية خنست فى ودنك ، قالتلك عنده مال يغنيكى

بيه ، وطن يرمح فيه الخيل ، بالذهب يكسيكى لأجل ما تفكى علتى الى أتوشمت بيها ،

خدى الورث كلاته يا حدادة ، كوشى على كل شبر بملكه ورجعيلى عصب يدى رجعيلى

عافيتى الى إنسرفت منى ، يفيد بإيه الورث وانا مش قادر أوصل عصبى بالأرض

مسرحية (طوق) - عن رواية (الطوق والإسورة) - صياغة ودراماتورج : محمد علي إبراهيم

راوية : حلنى من طوقك يا حداد

الحداد : كلنا متسلسلين فيه يابت الصياد ، وسرى اللى إنكشف بجوازنا ربطة بيناتنا لطول العمر

راوية : رايدنى أولس عليك كيف ماولست على مرتك ، لا يا حداد ، ارمى يمينك لأفضحك وسط

الخلايق

الحداد : طوق ومتسلسلين فيه يابت الصياد ، مايحك منه غير الموت

راوية : هملنى يا حداد ؟ الحقونى يا خلق

الحداد : (تجرى ليجرى ورائها) مبارك يا عروسة .(ينتحر)

وسط النيران تصحو فهمية وهى تنظر إلى النيران حتى تجد مصطفى أمامها لتطير من الفرح بينما

يتحرك مصطفى على أركان المسرح وفهمية ورائه وقد رحب به الجميع وكأنها تتمنى حدوثها

فهمية : حمدالله ع السلامة يا ابن البشارى ؟

يتحرك مصطفى ناحية الورشة وفيها الحدادة وفهمية تتبعه

الحدادة : مبارك رجوع مصطفى يا فهمية ، وين الحداد مجاش معاكى يزورنى ليه ، أتوحشت لبتك

عروسة سعدى ولدى

يتحرك مصطفى ناحية بيت الحداد وفهمية تتبعه

فهمية : مصطفى عاود يا حداد .

الحداد : طب هالبس خلقاتى ولبسى ولادنا هدموم زين عشان نقابل الغالى.

يتحرك مصطفى ناحية البشارى الجالس يضحك وفهمية تتبعه

فهمية : أنت حى يابا

البشارى : انا حى فى قلبك يا فهمية

فهمية : مصطفى عاود

البشارى : صبرتى ونولتى يابتى

يتحرك مصطفى ناحية الكرنك وفهمية تتبعه

مصطفى : عملت إيه فىكى السنين يابت أبوى ؟

فهمية : مالك ع تبصلى كده ليه ؟

مصطفى : سايق عليك ريحة الكرنك هات بتى يا مصطفى .

عراف : المعبد القديم المشيد من الحجارة الكبيرة .

تراجع في البيت والعراف يتحرك ناحيتها لتتحول الصورة إلى كابوس

مصطفى : بت الحرام من صلب المعبد

فهيمة : بتى

مصطفى : عارى يا فهيمة

تجسس فهيمة داخل البيت وترى جميع الخطوط وهى تواجهها

الحدادة : كل حى مننا فى قلبه ذنب هينش فيه لحد ما ربك يقضى

عراف : فى الداخل رب النسل مكشوف العورة

الحداد : انتى طالق يابت حزينة .

البشارى : متهمش البيت من غير راجل يا ولدى .

فهيمة : أبعدوا عنى ؟!

تزايد الكوابيس متصاعدة حتى تخفت فجأة لحظة قيام حزينة من الكابوس وتندفع إلى إبنها تطمئن عليها

حزينة : يا مرك يا حزينة ، عافري يابت مع الحمي ، هجيبلك ميه

تتحرك تاركة إبنها التي تهذي هذيائها الأخير حتي تشعر بوجود شبح الموت

فهيمة : بتى يامه بت التمثال الانتيكة لا الحداد ابوها بس بتى يامه ، ومصطفى خالها راجعها.

حزينة : (تستشعر ملك الموت كأنها تتعارك معه) بَعْدَ !، جاي ليه ؟، جاي لمين ؟، بَعْدَ !!، همل

بتى لحالها محيلتيش إلاها ، همل عتب الدار ، كفاية الضل راح ، بَعْدَ ، لساها فى عمر

الورد، هملها لبتها ، قوله لا يا بشارى (تموت) بتى

إظلام

ومن التغريبة للعودة

تفتح الإضاءة على الشخصيات واقفة بتشكيلات على المسرح وإضاءتها خافتة المسرح نبوية تلعب

في كرم الشيخ الفاضل وهي تغنى أغاني صبيانية

السعدى : الشيخ فاضل يملك كرم نخل لا سور له ، خلف داره الكبيرة وحتى تحصل نبوية على

مرجيحة ستعقد طرف الحبل الطويل في ساق نخلة والطرف الاخر في ساق نخلة

البشارى : وما بين النخلتين فضاء متسع تطير فيه نبوية وقد بسطت ذراعيها قابضة على الحبل

الذى يحز في عجيزتها ويرفع الهواء الثوب ويلفح الوجه الجميل ويجعل الشعر يتطاير ويأتى

بالبهجة التى تصنع الضحك ، نبوية الوارثة لوالدها شرعا وقانونا .

فهمية : ابن الشيخ الفاضل مقارب لنبوية فى العمر وهو الوحيد الذى يشاركها اللعب عندما يعود

من المدرسة

وبعودة للغائب ...

ورشة الحداد حيث الحدادة وولدها السعدى وقد كبر وفى قلبه عشق لنبوية ابنة خاله

الحدادة : حمى نارك يا سعدى ، الى واخذ عقلك

سعدى : مفيش يامه

ينظر السعدى ناحية بيت البشارى حيث تلعب نبوية ويدخل عليها خيرى

خيرى : لساكى بتلعبى الحجلة يابت ، توك ماكبرتيش ؟

نبوية : (فرحة) عاودت ميتة من بحرى ؟

خيرى : يادوبك رجعت م الجامعة قولت أجي أطل عليكى ، فين جدة حزينة ؟

نبوية : عند المقام

خيرى : لساها ع تدعى خالك يرجع من غربته ؟

نبوية : وعيرجع ، مسير الغايب يعود

خيرى : ع تدعى أنتى كمان.(تضحك نبوية) عتضحكى على ايه ؟

نبوية : على حسك ، ستى تقول أن صوتك خشن كيف المنجل الى ع نحش بيه البرسيم

خيرى : عشان راجل يابت ، والله لأعبطك وأديكى علقه زى زمان

نبوية : ملكش حكم على ، بأماره إيه أدعيلك ؟!، إنت الغربة فى دمك لساك فاكّر إن ليك فى الكرنك

بيت وعزوة.

خيرى : الكرنك لساها موجود لا الآثارات هتدب فيها الروح ولا ناسها بتتبدل .

نبوية : مش هتلاقى أحسن من ناسها يا خيرى

خيرى : مش هتلاقى أجهل من ناسها ، بره الكرنك دنيا وبره الدنيا دنيا هنقرا عليها فى الكتب ، وناس

عايشة بينا وبينهم سوق وانفتح والجدة الى يملك زمامه ويحسبها بدرى

نبوية : فيها جدورك

نبوية : الجدر باقى فى الأرض وسهل وصله

نبوية : فيها أنى..

خيرى : (ينظر لها نظرات ذات مغزى ويغير الموضوع) فاكرة يابت لما كانوا يلمحونا بنلعب فى الحوش

عندنا فى الدوار كانوا يزعموا فينا ويضحكوا ويقولوا أخ وأخته ، دلوك كبرتى ووشك نحت ولا

بتوع السياما

نبوية : تطلع إيه الزما دى ؟

خيرى : ستات قمرات ع تشوفهم بيرقصوا حواليكى ، مغنى وتشخيص وحدوة تخطفك جواها، أنا وصحابى يوماتى هناك ، جوه شريطها أعودنا نساfer

يذهبان وراء الجدار تمهيدا للرقصة نستعرض خلالها أحداث التغريب كاملة فى فيلم قصير ونبوية وهي تتعرض لمظاهر التجسيد التي تتحول لإغتناب وفي النهاية تندفع يد حزينة تأخذها لمكان الحدادة.

حزينة: (تنادى) يا حدادة، يا حدادة، .انتوا يا جماعة يالى هنا.

نبوية : ما نعاود الدار يا جدة ونبقى ناجى فى نوبة ثانية.

حزينة : حقك يا بتى.

نبوية : مستورة يا جدة، الخير فى الطير عنبيع البيض ونشترى الى يلزمننا وانى عاعمل طواقى حرير زينة وعنبيعها

حزينة : هملتينا كثير يا حدادة، مآنش الأوان إياك ؟

نبوية : كيفك يا عمتى ؟

الحدادة : اسمى الحدادة يا بت

حزينة : على مهلك ع الصبية

الحدادة : مش قتللك عنتقابل يا حزينة، حتجبنى لحد عندى برجلك.

حزينة : وجيتلك يا حدادة وما عرجعش دارى الا ويدي على ورث البنية

الحدادة : ورثها من مين يا ولية ؟

حزينة : من ابوها، من الحداد الجبالى

الحدادة : عاملاكى جاية تعزنى فيه

حزينة : الحداد مات كافر يا حدادة . راح بذنب بتى وما يجوزش عليه العزا

الحدادة : ساكنة ليه صبية ؟ ، جدتك عتقول أبوك كافر، ما حمقتيش ليه على أبوكى، مش يقولوا

الدم بيعن، ماحتتيش ليه عاد؟

حزينة : اتحدتى معاى أنى يا حدادة،

الحدادة : أنى عاقصر فى الحديث، الحداد اله يرحمه باع لى ورثه من أمى وأبوى وورقة البيع معاى محتومة وعليها بصمته، صراها فى عبي ودسناها كيف ما انتداسه فى قلبك سر الصبية، ومدارية عليه سنين،

حزينة : سر ايه الى انا دساه، قولى يا حدادة كلمة الحجر واضربى الودع وبينى المستخبي
الحدادة : أقولك يا ختى، الحداد أخوى كان معمول له عمل،

حزينة : واحنا الى عملينه اياك،

الحدادة : من يوم ما اتجوز بتك ولحد ما طلقها وحبال الخلف عنده معقودة سبع عقدات.

حزينة : اسكتى، اسكتى يا حرمة،

الحدادة: عتعرفى يا صبية كيف الراحل تبقى حباله معقودة وتخلف مرته،

حزينة: (تهم بضرب الحدادة) اخرصى يا وليه، اخرصى واعرفى كلامك رايح فين وجاى من فين ؟

نبوية : جده، جده عمتى عتقول ايه، يعنى ايه ؟

حزينة: (مقاطعة) اسكتى، اسكتى يا بنيتى.

الحدادة : ما تنسيش تفهميها فى الدار وان كنت متعجلة تفهمى يا صبية خلى جدتك تفهمك فى السكة، سعدى، واد يا سعدى.

السعدى : ايوة يامه.

الحدادة : وصل الضيفة، أصلها ما عتشوفش قصاها وعتتكرز (بهم يامساكها)

حزينة : تشكر يا ولدى، عسند على نبوية، بت خالك

الحدادة : نبوية، ابقى سلمى على خالك مصطفى أما يعاود

حزينة هى تدخل إلى الدار وورائها فهمية وهم يخلعون ملابس الخروج ليجدوا أمامهم مصطفى

مصطفى : عامله يا أم مصطفى.

حزينة : مصطفى ، عأحلم وانى صاحية، حتى الحلم بدرى همل منامى مصطفى، مصطفى بصرح، قربى

اللمبه يا بت، عنيا ماشايفاشى ،انت مصطفى ولدى ،ولد البشارى مصطفى ولد حزينة (تبكى

(.

مصطفى : معتحلميش يا أمه، مصطفى عاود ليكى ول ..

نبوية : انى نبوية بت فهمية، نبوية يا خال.

مصطفى : ما شاء الله انى قلت عاجى الاقيكى لساكى بضاير يا بت الغالية
حزينة : خيتك قعدت تعافر مع الحمى تعافر ومنين ما تفيق عتقولى مصطفى، مصطفى رجع يا أمه،
استنوك يا ولدى، أبوك البشارى وروحه طالعه ما كنش على لسانه غير قوله أرجع يا مصطفى،
مصطفى: (محاو لا تغيير الموضوع) شوفى جبت لك ايه يا صبية .كنت فاكرك لسه عيله، شوفى.
نبوية: انى الى جبت لك يا خالى، **(تخرج طاقيه رأس)** شوف انى الى غزالها من الصوف وعاييع
واكسب كمان، البس، البس يا بوزيد،

مصطفى : أبو زيد.

نبوية : أمى وأنا صغيرة كانت تقولى خالك ولا بوزيد الهلالى سلامه، .لو قرب على عشر رجالة بزند
واحد عيسلموا طوالى **(تتحسس ذراعه)** اقرب اقرب يا خال على يدى، ما بتاكلش اياك،
ياللا يا خال ورى بت أختك قوة أبو زيد، ، مهدود من السفر اياك، وأنت داخل علينا ليه
كنت عتسخ فى رجلك سخ، ، أبو زيد ماكانش عيكل.

حزينة : بزياداك رط يا بت، خالك راجع تعبان، يا دويه يسبح وينفض عن جتته تراب السفر وأنى
عاحضر الوكل زمانه أتوحش لوكلنا.

نبوية: (مسترسلة) أبو زيد كان (فجأة) جدة، جدة نفسى غامة على، عأرجع الى فى جوفى،

حزينة : أهمدى ، تلاقيكى مادقتيش الزاد **(تخرج مسرعة)**

حزينة: (يصمت) على فين يا مصطفى.

مصطفى : عتطن على البنية.

حزينة : هملها، عترجع فى الخلا وتعاود(تأمله) الغربة خدت منك كثير يا ولدى؟

مصطفى : يوووه ياما ، سرحت فى بلاد الخلق مدوقتش أمر من طعم الغربة ، محسيتش بيها إلا وأنا
والخلايخ طول الطريق بتعزىنى فى أبوي وأختى

حزينة : انت نسيت طبائع وسلو ناسنا يا ابن الكرنك ، العين ما بتنضرش غير اليد المحملة، فى خشم
كل واحد يسلم عليك فى رجعتك سؤال طابق على نفسه، بس متلوم يسألهاولك والسؤال
فضاح.

مصطفى : سؤال إيه يامه ؟!.

حزينة : عملت إيه فى سنين غربتك يا ولدى ؟

مصطفى : أديني عايش مموتش .

حزينة : رجعتك بالدنيا .

مصطفى : كنك متلومة كيه الخلايج ؟

حزينة : حزينة سبلت عين ابوك بيدها وكانت راجل ومرة، بيدي كفنت اختك في عمر العرايس ،

امك الى عملت لبت اختك ام اب وجد،الى طفحت الكوتة عشان ماحدش يحس بالدار

بايته فيها عشا ولا ممفيهاش، ما تستنظرش مال ولدها الى شقيان عليه

مصطفى : انا خابر وجاي أشيل عنك مازودكيش ، من بكرة هانصب عند المرسى ، مفيش مبحر

ولا مقبل إلا أما بيجوص من هناك ، أبني خص لحسابي واييع وكل للمسافر ، بزياداني حكم

النفس ع النفس ، أبقي حر روحى ، وأمد جدرى تانى فى أرض الكرنك وأضلل ع البيت

باللى فيه.

حزينة تعطيه عصا والده بعد أن يسترسل في حديثه

حزينة : قبل ماتستلم عزا أختك من الخلايج ردلها حقها وورثها من الحدادة.

مصطفى : حاضر يامه ، أنا ليا ويا الحدادة حديث تانى

تتقل على ورشة الحدادة والسعدى يقوم بالدق على السندان

الحدادة : ياواد الشغل هد حيلك ، أطفى النار وارتاحلك حبة

السعدى : هاععمل بيها إيه الراحة يامه ، أديني بقضى وقتى

الحدادة : ماقولتلك أجوزك ، شاور أنت على اى واحدة وانا أجيبها لك تحت مداك ، وانا حيلتى

غيرك

السعدى : لسه مآنش الأوان يامه

الحدادة : طب أطفى النار وارتاحلك حبة

السعدى : هانقل الفحم للمخزن وارتاح ، حاضر

يتحرك السعدى ناحية المخزن وتتجه الحدادة للأعلى إلا أن مصطفى يدخل على الورشة

مصطفى : حدادة،، انتى يا حدادة.

الحدادة: (خارجة من باب الدكان) ارفع شومتك عن باب الدكان،الباب حديد ماعيكسرش واصل.

مصطفى : باقولك ايه يا حداده، ملاوعه معايا ما عتشفش أنى رأسى أنشف من الحديد بتاع باب دكانك.

الحدادة : طب مش تعرفو الأول احنا بنكلمو مين قبل ما نشفو دماغنا ؟!.

مصطفى : أنى مصطفى ولد البشارى خال نبوية بنت الحداد

الحداده : حمد اله ع السلامة يا ولد حزينة ؟!.

مصطفى : ولد البشارى خال نبوية بت الحداد، أقولها لك كمان ،أغنيها ع الربابة

الحدادة : غنيها يا ولد الهلالى ولا أقولك ما تاجى تلف بيها الكرنك، دار دار اسمع يا ولد حزينة، أنى

لسانى مكتمة ع السر، السر الى بيناتنا كلمة زيادة والفضيحة عتبقى على كل لسان

مصطفى : فضيحة، انهى فضيحة فيهم، فهمة مبتخفش معيوبة أرض بور واهى خلفت يا حدادة، الحداد

معمول له ،مربوط، واهو خلف يا وليه، الورث باعهولك الحداد قبلما يموت، فيه فضايح تانيه

الحدادة : فضيحة الحريقة يا خال الصبيه الزين، اسمع يا ولد الناس أنى مارضتش أقول لأمك ، الحداد

حرق روحه وحرق مرته معاه عشان متنطقش واصل عشان فضيحة أخوى ماتبقاش ليها

رجلين، الحداد ما عيقدرش يخلف لا من خيتك ولا من بنت الصياد ولا من بنات الانس

كلا تهم.

مصطفى : معاكى ورقة بالبيع والشراء، معاكى ورقة انه ما بيخلفش

الحداده : معايا لسانى يا مصطفى، لسان الحداده

مصطفى : واحنا كمان معانا، معانا كثير يا وليه والحكاية لساها مطولة وانى باحذرک نخلص أمورنا

بالمعروف وتتراضى النفوس ويادار ما دخلك شر.

الحداده : مع السلامة يا ولد البشارى، وقول لحزينة حكايتنا يا تهيبها المحكمة يا ينيها الدم

(ينصرف مصطفى)

السعدى : مين الى كان موجود فى الدكان يامه ؟

الحدادة : تقطعه وتقطع سيرته، ابن حزينة

السعدى : خال مصطفى ، مناديتش عليا ليه يامه ، (يتحرك) أما أحصله

الحداده : أقف مكامك يا ولد ، هو مين دا عاد الى بدك تحصله

السعدى : ميصحش مسلمش عليه ده جه لغاية الدكان ، ياكل وشى لما أقابله ، الله يجازيكى يامه
كنت عايز أفاتحه

الحدادة: (مقاطعة) قبل امك يا سعدى، انطق يا واد فيه ايه بيناتكم

السعدى : هطلب يد نبوية بت خالى الحداد ، وبركة انه رجع لأجل ماحط ايدى فى ايد راجل
الحدادة: (ينزل الخبر عليها كالصاعقة) ايه، عتقول ايه، تتجوزها تتجوز بت فهمية ، عنعيده تانى
اياك، كلمته اياك، فاتحته أنطق اتكلم، مصطفى عيقولى لسه الحكاية مطوله، وانى عاسأل روى
مطوله كيف ، أتاى السلسال واصل والى حدوته بتكر تانى قصاد عيني

السعدى : ممانعه ولا آيه يام السعدى ؟

الحدادة : على جتتى يا عريس، على جتتى جوازك من بيت البشارى.

السعدى : مالها نبوية دى بت خالى

الحدادة : نبوية ماهياش بت خالك وإياك أوعالك بتنطقها مرة تانية

السعدى : بت خالى بت الشيطان هاتجوزها

الحدادة: (تصفعه) عتصانى يا ولد القناوى، بقيت راجل وأول ماصلبت طولك صلبته على أمك
، أرجع عن اللى فى راسك وإلا أحرملك م الورث .

السعدى : عتجوزها يامه ، ولو رايدة تحرمينى من الورث أحرمينى ، هاهمل الورث والكرنك بدكانه
بقراريطه واخذ نبوية وتنزل لأرض الله طالما أرضك مسيرها بوار ، لو أرض طيبة كانت زرة
أخوكى عششت ع الدار وضللت عليه، إنما الأرض عاصية والكاس اللى شرب منه أخوكى
دلوك بتحايلينى بيه ، كيف ماعملتى مع خالى الحداد اللى فضلتى وراه بموال الورث لحد ما
فاتهلوك و حرق روجه ، يومها شوفت نار الورث ولعنتها وخفت ألعنك وانا شايفك واتى
بتدسيه الشر لأجل تحافظى ع الورث ، ورثك رخيص يامه ، وانا مهرى غالى (يجرى أمامها)

الحدادة : ارجع يا ابن القناوى، ارجع، بدك ايه تانى منى يا حزينه ، بدك ايه، بدك الورث ولا
الولد، بدك ايه تانى منى يا حزينه.

نقل على الخص ومصطفى يقابلها فى الطرقات لتقع أمامه

حزينة : ولدا الحق عارك يا مصطفى لم عرضك يا ولدى.

مصطفى : ارتاحى يامه مالك ؟

حزينة : أرتاح ، حزينة ما بترتاحش ، حسابك يا حزينة فوق طاقتك و الفضيحة ماماتاتش يا مصطفى

مصطفى : وطي صوتك يامه ، فضيحة أيه إحنا صاغ سليم وأنا...

حزينة : مش سليم يا ولدى مش سليم، بت أختك بقالها يومين حالها مش هو الحال ، لبست هدمتى وملايتى ومن سكيكى كشفت وديتها للداية ، قالتلى طبقها مشروخ ، الطبق مشروخ يا ولدى

مصطفى : بيا ع الدار يامه

حزينة : مقدراش

مصطفى : أتسندى على يامه

حزينة : المرادى مقدراش ، كنت خابرة أن أخرتى تحت نار الشمس مفيش بيت هيضل عليا وانا بقابل ضيفي ، زيارته ثقيلة يا ولدى ، البشارى كان صح ، ضلل على تربتى يا ولدى ، شمس الحساب حامية (تموت)

الحدادة : سعدى

مصطفى : نبوية

في تلك الأثناء ينظر السعدى ويتحرك ببطء حتى يدخل إلى نبوية وهى مربوطة فى الجدار

نبوية : (تدارى ربطتها) مفيش حد فى الدار

سعدى : الدار ؟! ، الدار دخلها الغريب وانتى الى فتحتيله يابت خالى.

نبوية : جاى تحاسبني ؟

سعدى : لأجل ماحل طوقك الى أتطوقى بيه لغيرى ، كان ليا فى الكرنك بيت هملته لأجل ماتبقى عزوتى ، كان ليا فيه ورث وبعده لأجل ماطولك أنتى ، عشقتك وانتى لغيرى عاشقة

نبوية : أنا معشقتش

سعدى : مين ؟

نبوية : معنطقش

سعدى : (بجدة) عتدارى عليه ، عاشقاه، تديله أرضك وتحاجى عليه، انطقى مين ؟

نبوية : بجملة الحساب ، من سواعى ماوعيت ويني وبين دى الورث وناره ، خناقة دايرة فى أصلى
وبذرتى ، أبوكى مين ، عملت أيه أمك فى المعبد ، عركة سممت روحى ، مكنش ليا خضار
أسرح فيه بقلبي ، كان جمر عيشة عليه ، دلوك ع تقول عاشقنى كنت فى لما إتغرب الضل ؟
وانا بوطى أخدم لأجل ما فضل عايشة ، كنت فى لما ضفايرى إتحت ، الشرف نحمله نار
تضوى الكرنك بحاله لكن أنا وحدى قاعدة اهنة فى الكرنك لنار الشمس

سعدى : كنت ضلك واتى الى خرجتى برجلك لنار الشمس
نبوية : الضل مش بالدم ، لو رايدة بالدم أنى قصادك (يرفع سكينه) برد جمرى
يدخل مصطفى مسرعا

مصطفى : همل نبوية يا سعدى .

سعدى : بركة إنك جيت (يرميها أمامه) بنت أختك أهى قدامك ، لم عارك (يعطيه السكين) له .
(يمسك السكين بمرارة وهو ينظر إلى نبوية التى تبكى فى صمت منتظرة قرار مصطفى) حزينه ماتت
مصطفى : يا بت فهمية ؟! ، مبقتش عارف أضلل عليكى ولا عليها ، ماتت وسابت فى الدار
شرح مقادرش أمله .

سعدى : السكين فى يدك

مصطفى : أتغربت وأتى الى راح تدفعى تمن غربتى ...

سعدى : لأجل ماتتق بين ناسك راجل

مصطفى : شورى عليا يابت الغالية (يحاول أن يأخذ القرار ويتراجع) مقادرش !.

نبوية : بيدك يا خال

مصطفى : مقادرش

نبوية : بيتى بيدى أنى ...

يحاول مصطفى أن يمنعها عن قتل نفسها ويرمى السكين بعيدا لتقع أمام سعدى الذى يحاول أن
يطعن نبوية ليتصدى لها مصطفى ويمسك بسعدى بقوة وهو يصرخ على نبوية التى تلتاع الأمر

مصطفى : أهربى يا نبوية ، أهربى بره حيطان الكرنك

سعدى : عتدارى عليها ، هملنى ، فى عرفى هيا خاطية ، هملنى ...

يقع مصطفى أرضاً ويحاول سعدى أن يتحرك ليقتل نبوية ولكن يد مصطفى تمنعه وهو يعطى مساحة
 لنبوية للفرار ، ومن ثم تأتى على نهايات الدراما والتي تتجسد فى التالى حدادة وحزينة على قارعة
 الطريق ، خيرى مسافر ، سعدى مازال يبحث عنها يحاول البشارى أن يجيرها ولكن بلا فائدة ،
 يتبعها سعدى بالسكين عازما على قتلها ولكنها تنزل عند الجمهور تختبئ بينهم وهى تتم كالمذعورة ،
 يرى سعدى نبوية وهى عند الجمهور فىرمى أمامهم السكين جاعلا القرار فى يدهم مع أغنية الخاتمة

ستار الختام
 محمد على إبراهيم